

**Uunga siunnersuut: Kalaallit Nunaata Aatsitassarsiornermi Aningaasaateqarfia pillugu  
Inatsisartut inatsisaata allanngortinneqarneranik Inatsisartut inatsisaat nr. xx, xx xx  
2016-imeersoq**

*(Aatsitassarsiornermi aningaasaateqarfiup isertitaasa tunngavii)*

**pillugu**

**Aningaasaqarnermut Akileraartarnermullu Ataatsimiititaliap**

**inatsisissatut siunnersuutip aappassaaneerreqarneranut**

**ISUMALIUTISSIISSUTAA**

Ataatsimiititaliap suliarinninnermini ilaasortarai:

Inatsisartunut ilaasortaq Jens Immanuelson, Siumut, siulittaasoq  
Inatsisartunut ilaasortaq Aqqaluaq B. Egede, Inuit Ataqtigiit, siulittaasup tullia  
Inatsisartunut ilaasortaq Suka K. Frederiksen, Siumut  
Inatsisartunut ilaasortaq Steen Lyng, Atassut  
Inatsisartunut ilaasortaq Tillie Martinussen, Demokraatit  
Inatsisartunut ilaasortaq Peter Olsen, Inuit Ataqtigiit  
Inatsisartunut ilaasortaq Sara Olsvig, Inuit Ataqtigiit

UKA 2016-imi ulloq 23. september siullermeerinninnerup kingorna ataatsimiititaliap siunnersuut misissorpaa.

**1. Siunnersuutip imarisaa siunertaalu**

Inatsisartut aalajangiinissaannik siunnersuutip malitsigisaanik siunnersuut suliarineqarpoq, taannalu Inatsisartut 2015-mi ukiaanerani ataatsimiinneranni suliarineqarlunilu akuerineqarpoq. Inatsisartut aalajangiinerat Inatsisartut 2013-mi ukiakkut ataatsimiinneranni suliarineqarlunilu akuerineqartup assigaa (UKA 2013/85). Inatsisartut 2013-mi aalajangiinerata kinguneranik 2014-mi upernaakkut ataatsimiinnermi aatsitassarsiornermi aningaasaateqarfik pillugu Inatsisartut inatsisaata allanngortinneqarnissaa pillugu siunnersuut (UPA 2014/129) saqqummiunneqarpoq. Qinersinissalli nalunaarutigineqarnera pissutigalugu siunnersuut atorunnaarpoq.

Inatsisissatut siunnersuut una 2014-mi inatsisissatut siunnersuummit allaaneruvoq. Aatsitassarsiornermi aningaasaateqarfik pillugu inatsimmi pigisat nalillit aalaakkaasut isertitatut nassuiaatigineqartut inatsisissatut matumani siunnersuutikkut tamakkerlutik atuukkunnaarsinneqanngillat, taamaallaalli pigisat nalillit aalaakkaasut aatsitassarsiornermi ingerlatanut

atugassatut pilersinneqartut atorneqartulluunniit pissarsiarineqarneranni Namminersorlutik Oqartussat isertitaat kisimik pineqarlutik.

Pigisat nalillit aalaakkaasut aatsitassarsiornermi ingerlatanut atugassatut pilersinneqartut atorneqartulluunniit tassaapput pilersitat piginnittup akuersissummik pigisaqarnermigut aatsitassarsiornermik ingerlataqarnermini pilersitai atugaaluunniit.

Siunnersuut akuerineqassappat aatsitassarsiornermi aningaasaateqarfimmut inatsimmi isertitanut nassuiaatit Namminersorlutik Oqartussat pillugit inatsimmi isertinut nassuiaatinut ilaatigut naapertuukkunnaassapput.

## **2. Siunnersuutip Inatsisartunit siullermeerneqarnera**

Siunnersuut siullermeerinninnermi amerlasuunit taparserneqarpoq.

## **3. Tusarniaaneq**

Siunnersuut 2016-mi maajip 24-nit juunip 28-nut pisortanut kattuffinnullu makkununga tusarniutigineqarpoq: KANUKOKA, Kommuneqarfik Sermersooq, Naalakkersuisut Siulittaasuata Naalakkersuisoqarfianut, Aatsitassanut Ikummatissanullu Naalakkersuisoqarfimmut, Inuussutissarsiornermut Suliffeqarnermut Niuernermullu Naalakkersuisoqarfimmut, Bank-Nordik, Grønlandsbanken, SIK, Sulisitsisut aamma Nusuka.

Tamatuma saniatigut siunnersuut namminersorlutik oqartussat nittartagaat aqqutigalugu tamanut tusarniutaavoq. Tamanut tusarniutigineqarneranut atatillugu oqaaseqaatinik tigusaqartoqanngilaq. Tusarniaanermut akissutit tiguneqartut siunnersuummut nassuiaatini Naalakkersuisunit nassuiaatigineqarlutillu oqaaseqarfigineqarput. Tusarniaanerup ingerlanneqarneranut ataatsimiititaliaq allanik oqaaseqaatissaqanngilaq.

## **4. Ataatsimiititaliap siunnersuummik suliarinninnera**

Siuliani oqaatigineqartutut siunnersuut akuerineqassappat aatsitassarsiornermi aningaasaateqarfimmut inatsimmi isertitanut nassuiaatit namminersorlutik oqartussat pillugit inatsimmi isertinut nassuiaatinut ilaatigut naapertuukkunnaassapput. Tamanna tusarniaanermut akissutini tikinneqarsimasoq ataatsimiititaliamit immikkut maluginiarneqarpoq.

Tusarniaaneq pillugu allakkiami allassimavoq Inuussutissarsiornermut, Suliffeqarnermut Niuernermullu Naalakkersuisoqarfiup oqaatigigaa

*"siunnersuutip kingunerissagaa, aatsitassarsiornermi aningaasaateqarfiup inatsisaani isertitatut isumaq namminersorlutik oqartussat inatsisaannut naapertuukkunnaassasoq. Aningaasat namminersorlutik oqartussat inatsisaanni § 7, imm. 2 naapertorlugu isertitat isumaannut attuumassuteqarsinnaavoq, naak suliat nalillit aatsitassarsiornermi aningaasaateqarfiup inatsisaanut attuumassuteqanngikkaluit, aningaasallu pisuullutik qallunaat naalagaaffiannit namminersorlutik oqartussat inatsisaanni § 8 naapertorlugu Kalaallit Nunaanni Namminersorlutik Oqartussanut ukiumoortumik tapiissutit annikillisinneqarsinnaassallutik, naak aatsitassarsiornermi aningaasaateqarfimmi taakku nalingat pissarsiarineqanngikkaluartoq, kiisalu*

*namminersorlutik oqartussat aningaasartuutaat taakku nalingannik nalikilli-sinneqanngikkaluartut.*

*Inuussutissarsiornermut, Suliffeqarnermut Niuernermullu Naalakkersuisoqarfiup tamatuma kingunerisinnaagaa oqaatigivaa, Kalaallit Nunaanni Namminersorlutik Oqartussat ukiumoortumik tapiissutitigut qallunaat nallagaafiata ilanngaataasa nalinginik aningaasaliissuteqartariaqarlarsinnaasut.”*

Tamatuma peqatigisaanik Naalakkersuisut tamanna pillugu ima oqarnerat ataatsimiititaliamit maluginiarneqarpoq:

*“Siunnersuut akuersissutigineqassagaluarpat, aatsitassarsiornermi aningaasaateqarfiup inatsi-saani isertitatut isumaq ilaatigut namminersorlutik oqartussat inatsisaanni isertitatut isumma-mut naapertukkunnaarsinnaavoq.*

*Taamaalilluni suliat nalingisa nalingat namminersorlutik oqartussat inatsisaanni § 7, imm. 2-mi isertitatut isummamut attuumassuteqarsinnaavoq, naak suliat nalingat aatsitassarsiornermi aningaasaateqarfiup inatsisaanut attuumassuteqanngikkaluartuq.*

*Taamaammat siunnersuutip ilaatigut kingunerisinnaammagu namminersorlutik oqartussat namminneq aningaasaliissuteqartariaqalersinnaanissaat eqqortuuvoq, tassa qallunaat naalagaaffiata tapiissutaanni annikilliliissutaasup nalinganik.”*

Tamanna ataatsimiititaliamit tusaatissatut tiguneqarpoq.


##### **5. Siunnersuutip aningaasaqarnikkut kingunerisassai**

Siunnersuutip piviusunngortinneqarnerata aningaasaqarnikkut kingunerisassai siunnersuummut nalinginnaasumik nassuiaatini immikkoortoq 3 aamma 4-mi nassuiaatigineqarput. Taakku ataatsimiititaliamit tusaatissatut tiguneqarput.

**6. Ataatsimiititaliap inassuteqaatai**

Tamanna tunngavigalugu siunnersuut Inatsisartunit akuerineqassasoq **ataatsimiititaliap isumaqatigiittup inassutigaa.**

Taama oqaaseqarluni isumaliutissiissummilu allassimasutut paasinnilluni ataatsimiititaliap siunnersuut aappasaaniigassanngortippaa.




Jens Immanuel, Siulittaasoq




Aqqaluaq B. Egede




Suka K. Frederiksen



Steen Lynge



Tillie Martinussen



Peter Olsen



Sara Olsvig